

Zeitschrift: Igl Ischi : organ della Romania (Societat de Students Romontschs)
Herausgeber: Romania (Societat de Students Romontschs)
Band: 63 (1978)
Heft: 10

Artikel: Conformists e opportunists
Autor: Camartin, Iso
DOI: <https://doi.org/10.5169/seals-881894>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 01.04.2026

ETH-Bibliothek Zürich, E-Periodica, <https://www.e-periodica.ch>

Conformists ed opportunists

da Iso Camartin

Avon gleiti 30 onns ha Alberto Moravia publicau in roman cun il tetel «Il conformist». Ad in publicum pli vast ei l'ovra vegnida enconuschenta 1969 entras il film che Bertolucci ha creau sebasond sin il roman da Moravia. Igl ei la historia d'in giuven ord ina famiglia beinstonta, mo era decadenta, che ha in basegns permanent da snegar sia atgnadad persunala per daventar «in sco tut ils auters», in senza privilegis ed extravaganzas. Sco survient e funcziunari dil stadi faschist s'adattescha el a quei che ins spetga dad el: Cun regl endinau daventa el in brav burgheis che fa siu duer era sche ei setracta da commetter in mazzament.

Quei che Moravia concentrescha en quella persuna ei buca mo igl agir patologic d'in esser trubistgau. Il curios basegns da fugir da problems persunals cun semetter cun pial e palegn a disposiziun dil schinumnu beinstar public enconuschin nus tuts enzaco, era ils pli equilibrai e suverans denter nus. Moravia raquenta ina historia exemplarica sur dallas forzas internas che catschan nus naven da nusezzi sut il schurmetg dalla convenziun. La lectura da siu roman po far nus aunc oz allerts per la fina erosiun da nies esser individual entras la pressiun da s'adattar a quei che la societad para da spitgar da nus. Igl ei in problem permanent per mintga carstgaun critic ed el vala enqual patratg.

Lein differenziar igl emprem denter «conformitad» e «conformissem». En la sociologia ed en la psicologia sociala drovan ins ils plaids «conformitad» e «deviazion» per circumscriber duas tendenzas fundamentalas dil singul enviers la societad. D'ina vart sesprova igl individual da sefar conforms allas reglas generalas, empau sco il recrut che – per haver siu ruaus – vul sefar remarcar da superiurs ni en senn positiv ni negativ; quei spargna conflicts e prestaziuns persunalas stravagadas. Ins sesenta stupent el schurmetg dils auters. Sche tuts ageschan en ina moda, sa quella buca esser diltut zanistrada: Aschia argumenteschan ins visavi sesez. – Da l'otra vart sentan ins naturalmein era la pressiun dalla societad enviers sesez. Ins sto cuntinudamein s'adattar. Mo internamein serebaulta enzaatgei encunter quei camond. Ins vul buca ual esser mo in utensil dalla societad che exequescha tut sin stausch anonim. Il basegns da deviar sefa valer. Ins emprova da spindrar las conturas persunalas che vegnan isadas ed ulivadas dalla societad tochen che tuts vesan ora quasi tuttina. Tgi che ha aunc buca schau ir cun tut il maguol ord ossa ed olma ha forza aunc la

forza da sefar libers. Per ils auters, ils «integrai», daventa el denton «agens», buca propi da fidar, in tip dapersei ed asocial.

Ins pretenda che il carstgaun normal mantegni ballontscha en quei process da sefar conforms e deviar. Normals ei igl integrau, quel che fa ni segls ni zambagls sperasora. Tgi che senuspescha denton da sesuttametter alla convenziun sto quintar cun sancziuns encunter sia persuna. Quellas san esser aschi radicalas che el sesiara en in mund individual e rumpa il contact cun ils auters. Quel che communichescha buca pli ei denton prigulus. La societad metta el a ferm.

Il frar-cuntrari dil carstgaun asocial ei il «conformist». Quasi cun deletg e premura semetta el a disposiziun dalla societad. El ei il pli fideivel collaboratur dil status quo. Zun negina difficultad ha el cun sevender al bein-star public. El snega sesez senza che sia cunscienza survegni il greufli. Per el gnanc duvrass ei camonds. Siu esser ei spira dispostadad e cumplaschientscha. El approbescha tut. La differenza denter submissiun e promptadad d'acceptar ei ida a piarder. Negin drova ordinar. El ei adina a disposiziun.

Dat ei in tal esser? Probabel ha negin viu quei signur Conformist ad ir a spass spir honzeliadad e fauls compliments per la Surselva entuorn. Sco el ei presentaus cheu eis el naschius en la retorta dil patratg. Mo ei dat quei signur. El sepresenta buca aviartamein alla publicitad. Persuenter secaveglia el cumadeivlamein en nies intern suenter che la letargia ed il manco da curascha civila han cuau ora el. El ei d'anflar en nus tuts. Sco in parasit s'engrascha el cun ried da tut quei che vul ruaus e tema la fricziun. El daventa gronds e grass e liquidescha in tec alla gada tut il material, cun il qual nus havessen saviu crear nossa individualitad. El ei ferm ed activ, surpren la reschia interna e meina nus cun inschign viaden amiez la muntanera humana.

Nus savein che l'individualitad ei periclitada entras l'uniformaziun che la societad sforza si a nus. Tuttina fagein nus aunc sco sche ei dess arcuns gigantics nua che la sostanza individuala ei a suost. Ins plaيدا spir respect dalla dignitad digl individi. Mo jeu seregordel buca d'in scolast en scola primara e gimnasiala che havess era mo cun plaids precauts animau al cumbat encunter la svaletaziun progressiva da quella sostanza individuala. Anzi: Ins insinuava permanentamein il s'integrar, sorprendere, semetter a disposiziun, star en per il bien general. Nua ein ils scolasts che han instruiu l'impurtonza dil dir na? Quels che han fatg curascha da sefutar dalla gronda carmalada? Che han fatg attents sin ils prighels che schaian en tutta dispostadad? Na, las regurdientschas ein autras. «Eri,

eri, grad murtgeu quiet, nuot canera, nin embrugl, sco signur professor vul!» Sche enzatgi schava percorscher resalvas, valeva el per in tip egoist, in che fageva «critica nunconstructiva», in revoluzzer malmadir, gie schizun in schliet schani. Haver dubis viers quei che era unschIU memia bein enteifer la societad valeva per prepotent. Vuleva in sedistanziar, sche stueva el prender en cumpra suspect malign e disfidonza. Ins prefereva la banalidad normada agl affrunt critic. Ei vegneva perdegau che ins dueigi far siu duer e quescher aschiditg che l'experientscha seigi buca pli gronda!

Oz ston ins pli che mai far igl advocat digl anticonformist. Encunter tutta ideologia da cooperaziun e vicendeivel cumpromiss ston ins sviluppar il basegns supprimiu da dir na, la curascha da refusar. Nua che ins sa, ston ins promover il sentiment per la resalva. La vusch dalla opposiziun individualista ei la suletta che po trubistgar ils himnis dalla planificaziun generala. Ei va buca per simplamein far opposiziun. Ei va per la pusseivladad da formar in meini. La proposta sa daventar perschuasiun pér cu ella ei semiserada endretg cun la cunterproposta. Ed ei va era per evitar che nus laguttien tissi mo damai che auters tegnan quel per medischina.

L'emprema cundiziun per la critica enviers il conformissem ei curiosa-mein la critica enviers sesez. Las guardias spirtalas han igl emprem da controllar ils agens impuls avon che ellas san dar a dies a quels dils auters. Il conformist ei quasi definius entras il sefutar d'autocritica. Tgi che ha buca formau sias resalvas cun criticar sesez vegn buca a haver las pli gestas enviers ils auters. Aschia sesiara il tscherchel: Nuot pli penibel che cu enzatgi daventa conforms cun sesez: cu el ha sragischau il dubi e la tscherca per quei che ei aunc meglier che el sez. Forsa che igl ei gia curdau en egl ad in ni l'auter che ils pli gronds conformists ein era quels che tarlischan il pli fetg da vanadad ed amur propria. Els senodan sco coccas egl agen pieun. Ins tegni egl e nas aviarts ed ins vegn a seperschuader.

Cun quei essan nus tier igl «opportunist». Era el ei in conformist, denton buca in naiv, mobein in malign e ruffinau. El fa fatschentas cun siu conformissem. Ins di che el volvi sia cassacca tenor il vent. En mintga cass ha el in fin nas per quei che ei ual opportun e cunvegn. El capescha da trer a nez il conformissem dils auters. Ils plaids peisa el bein, di quei che ins vul udir e cuarcla igl auter cun il fegl dil figher, sco sche ei mass per proteger il turpetg. El fa zuppabeinbein cun sias ambiziuns persunalas ed enfascha quellas en migliacs vertids da pupi. Tenor quei che el di ei sia occupaziun principala il «s'unfrir per la buna caussa» ed il «star en per ils interess cumins». El hagi strusch temps per sesez.

Lein esser gests. Opportunissem ston ins buca veser sco enzatgei absolutein negativ. In biolog ha avon buca ditg manegiau che intelligenza sei-
gi nuot auter che la habilitad da reagiar adequatamein en mintga situa-
ziun. Cun auters plaids: saver spert e gestamein tgei che cunvegn ed ei
opportun. San ins pia formular la regla: pli intelligents che in ei e pli op-
portuns che el vegn ad esser?

Quei astgan ins dubitar. Il lungatg lai far segls nos patratgs. Ins sa em-
pruar d'anflar novas definiziuns e far ord igl opportunist in fin realist ed
intelligent planisader. Mo ins vegn buca da scungirar la damonda morala
che sesaulza davos la tenuta opportunist. Nus enconuschin quels
utschals dalla bial'aura che contan adina la canzun che ins vul udir, era
sche ei ston duvrar bravamein tuns falsets per contonscher las altezias!
Igl opportunissem ei empau sco in lest ed in vezi. Ins di che l'uolp midi mo
il peil. Ils opportunists – che els senumnien lu pli detagliadamein carrie-
rists ni amitgs dil pievel – vegnan buca a murir ora. Igl ei ina rateina zaia
che catscha ragisch e prui empau dapertut. Seneziar dalla caschun ei ne-
gina zanur. La damonda ei mo, con flexibla la crusch dil dies sto daventar
per che ins sappi seruschnar sut cozza cun mintga buna caschun. Biars
vegnan da mantener postura era sche la crusch dil dies ei da gummi. Els
han la pial dira che tegn en fuorma.

Shakespeare ha dau a nus la pli biala lecziun, co ir entuorn cun opportu-
nists: scurclar lur meinis vagants, cumprometter els. Ins legi ils discuors
denter Polinius e Hamlet:

Hamlet: «Veseis leu quella nebla, cun fuorma quasi d'in camel?»

Polonius: «Dieunuardi, gie, l'ei quasi sc'in camel!»

Hamlet: «Jeu quetel, l'ei plitost sc'ina musteila.»

Polonius: «Ella ha il dies ual sco ina musteila!»

Hamlet: «Ni sco ina balena?»

Polonius: «Ual sco ina balena!»

Els ein buca morts cun Polonius, ils opportunists, el vegl casti da Helsin-
gör. Els van entuorn e vesan aunc adina ual quei che ils auters vulan ve-
ser. Nus havein neginas autras letgas che Hamlet. Els ein incurabels sche
ins vegn buca da far daventar els ridiculs a sesez.